

# Metter en discussiun tematicas grischunas

L'emprim numer dal magazin online «Raetia Publica» lantschà da la Pro Raetia e deditgà a la tematica da las las abitaziuns secundaras

DA MARTIN CABALZAR

■ Il nov magazin online «Raetia Publica» vegn purtà da la Pro Raetia che s'engascha per il bainesser e bainstar dal Grischun e da sia populaziun. Ina da sias finamiras è da metter en discussiun tematicas che pertutgan il Grischun. Ella fa quai annualmain a la dieta champestra e da nov era cun il magazin online «Raetia Publica». Iniziants da quest magazin èn *Johannes Flury*, president da la Pro Raetia ch'è l'uniun purtadra da la redacziun, *Sabrina Bundi*, schurnalista tar RTR, *Marius Risi*, manader da l'Institut per la perscrutaziun da cultura en il Grischun e *Curdin Albin*, graficher e schurnalist online tar RTR. Ils iniziants lavuran senza sustegn. Il start è vegnì pussibilità da sponsurs privats.

## Finamiras da la «Raetia Publica»

Tenor ils iniziants vul il nov magazin online infurmar davart ils connexs, promover e lantschar tematicas da dumondas naziunalas en la paratica e far retschertgas pli profundas davart temas politics, culturals, socials, religiuns ed economics.

Il project è preparà primarmain per ina durada da sis onns. Mintga dus mais vegn preschentà in artigel inicial pli lung davart ina tematica actuala. En duas curtas posiziuns pon las duas persunas pertutgadas prender posiziun pro u contra. Allora vegn il forum avert per il publicum. Giavischavlas èn ussa contribuziuns en tut las trais linguas grischunas. La redacziun resalva dentant la libertad d'eliminar reacziuns che cuntengnan persunas u che èn nu-



Il team da «Raetia Publica» preschenta ses nov magazin online. Da san. Curdin Albin, Johannes Flury, Sabrina Bundi e Marius Risi.

FOTO Y. BÜRKL

nadattadas u polemicas e violontas envers persunas.

## Leventar mirveglias

Sco Johannes Flury di è la redacziun plain mirveglias ed ella speria era che numerusas lecturas e numerus lecturs daventian medemamain mirveglius e contribueschian activamain al forum da discussiun. Il nov magazin na saja betg prevì sco alternativa u concorrenza, mabain sco cum-

pletaziun da la purschida schurnalistica actuala. Il magazin online sa drezza cuntant a persunas che èn prontas da leger in artigel pli lung, haja gust e peda da discutir a moda contradictorica. Il magazin na persequiteschia betg ina missiun politica. La finamira saja da preschentar pliras perspetivas.

Tenor Marius Risi na veglian ins dentant betg mo administrar conflicts, mabain analisar quels ord lur punctg da vista. La te-

matica duai esser vasta e cumpigliar economia, turissem, cultura e societad. Intgins titels che èn previds per ils proxims numers pon tradir in zichel la direcziun: «Revolta dals possessurs d'abitaziuns secundaras». Sch'il Turitgais crititgescha il Grischun – in'analisa da l'indignaziun» u «A scadin vitges festival». Tenor Sabrina Bundi èn las tematicas fitg lungas e documenteschas ch'i dat ulteriurs temas, dumondas, schanzas e problems en abundanza.

## Sustegn da sponsurs

La Pro Raetia metta a disposiziun 60 000 francs per ils proxims quatter onns. Plinavant vegnan sponsurs privats a garantir il start. Damai che las auturas ed ils auturs han dentant il dretg sin in'indemnisaziun minimal ed er ils custs d'informatica ston vegnir pajads. Perquai èn ils iniziants leds da scadina contribuziun dals lecturs che possibilitescha als iniziants da manar vinvant lur project.

## Revolta dals possessurs d'abitaziuns secundaras

L'emprim numer è deditgà a la «Revolta dals possessurs d'abitaziuns secundaras». Questa revolta che è sa manifestada suenter la midada da la lescha davart la promoziun dal turissem ha evocà reacziuns pli u main intensivass en las vischnancas pertutgadas. Ils possessurs d'abitaziuns secundaras vulan era pudair conceder davart per tge che lur taxas vegnan impundidas. E las vischnancas na vulan betg laschar cumandar memia bles las persunas che abiteschan mo parzialmain en il vitg, èn dentant dependents da quellas per stappar las rusnas da las casas turisticas. Per bleras vischnancas grischunas è quai in dilemma, analisescha Sabrina Bundi. Tgi che veglia cundecider stoppia era daventar Grischun. Preschentas vegnan las duas furmas da dialog tranter indigens e giasts a Tujetsch e Tavau.

A pled vegnan era la presidenta communal e deputada da Silvaplana *Claudia Troncana* e l'anteriura deputada e cussegliera naziunala *Vreni Müller-Hemmi* che è oriunda da Cuira.

Ed uss è il forum avert per in e scadin sut [www.raetiapublica.ch](http://www.raetiapublica.ch)